

## Rapport presidiel Uniun dals Grischs 2022

Zieva duos ans cun spustamaints dad occurrenzas u dafatta occurrenzas desdittas, ho l'UdG l'an 2022 finelmaing darcho pudieu fer dapü. La prüma mited da l'an d'eira dedicheda a commemoraziuns, la seguonda mited da l'an alura a las ediziuns. Ils müdamaints cumanzos dals ultims ans, haun cuntinuo e restaron inavaunt üna constanza. In prüma lingia il müdamaint dal sistem da commembranza, però eir adattaziuns da la pagina d'internet u dal dicziunari online.

Il müdamaint il pü visibel es gnieu preschanto a la radunanza generela in avrigl. Ils trais suprastants Hermann Thom, Duri Denoth e Marina Shuler-Fluor s'haun retrats e per els sun gnidas elettas Fadrina Hofmann, Violanta Rominger e Gianna Duschletta. La suprastanza s'ho il prüm piglio ün mumaint temp per s'imprender a cugnuscher e partir sü las lavuors e las responsabilteds aunz cu cumazer cull'organisaziun dad occurrenzas ed dad ediziuns.

Al principi da la sted vainsa festagio il 100level anniversari dad Andri Peer. L'occurrenza chi ho gieu lö a Lavin es steda bain visitada ed ün fich bel omagi al grand scriptur rumauntsch. Düraunt il lügl essans stos preschaints al cuors da rumauntsch a Samedan cun üna maisa da cudeschs. Que pussibiltescha da'ns preschanter a tuot quels e quellas – pelpü da la Bassa – chi s'interessan per lingua e cultura rumauntscha.

Inavaunt vainsa gieu üna bauncha al festival da la chanzun rumantscha a Zuoz, a la festa da raccolta a Valchava, al marchio d'Advent a Scuol, al marchio da Niculaus a Samedan ed eir al marchio da Nadel a Segl. Nus vains profito da l'occasiun per vender nossas ediziuns annuelas e da'ns preschanter scu nouva suprastanza a noss commembers e nossas commembras. Per quistas baunchas vainsa collavuro culla Lia Rumantscha, eir els haun vendieu cudeschs e gös. Impü vainsa lantscho üna concorrenza, inua cha vains tschercho ils plets predilets jauers, puters e valladers. Ils vandscheders e las vandschedras haun guadagno premis scu üna commembranza u buns da cudeschs pel Chesin Manella. Ils plets predilets d'eiran bels plets scu *minavla*, *prüvo* u *agnè*.

Sper las ediziuns annuelas, il Chalender Ladin, la Chasa Paterna ed il Dun da Nadel, ho l'UdG edieu quist an duos cudesch impü. Pel festival da la chanzun rumauntscha es gnieu miss insembel ün bellischem nouv cudaschin da chaunt, ils «Rebombs muntagnards». Il cudesch cuntogna novas chanzuns ladinhas chi haun il potenziel da dvanter novs sempverds e novas chanzuns da cumpagnia. L'otra ediziun es la traducziun dal classiker d'iffaunts «Il Grüflun».

L'an 2021 vaiva la radunanza generela decis dad elavurer ün muossavia strategic pel futur da nossa societad. In quel ram ho gieu lö da prümavaira ün di da lavur per la suprastanza. Düraunt quel di es gnida evalueda la situaziun actuela e la suprastanza ho exprimieu giavüschs e visiuns per l'UdG dal futur. Ün facit principel d'eira cha la suprastanza fo fich bgeras lavuors administrativas ed operativas, uschè cha las resursas nu bastan per lavurer strategicamaing. Üna consequenza es la manchaunza da visiuns e da svilup. A resulta ün minchadi static e la societad nun es pü buna da s'adatter als svilupps linguistics e sociologics. Visiuns, svilupps ed adattaziuns füssan però important per pudair sustgnair e mantgnair nossa lingua.

Perque es gnida fundeda l'an 2022 üna grupp da lavur chi s'occuppa da dumandas fundamentelas da l'identited e da l'avegnir da nossa societad. Il böt es da formular üna strategia concreta cu cha l'Uniun dals Grischs dess mantgnair, sustgnair e promover il rumauntsch i'ls prossems 10 ans. Las structurass e la lavur da la societad dessan gnir adattadas als möds da viver e lavurer dad hoz.

Suprastanza:

Victoria Mosca

Romedi Conradin

Fadrina Hofmann

Violanta Rominger

Gianna Duschletta